

CONCERTS

Perlas romanticas ed in Requiem emblidà

Chor viril Surses carmala cun Liszt



Igl Chor viril Surses preschainta aint igl concert sacral da chest onn scu ovra principala igl Requiem da Franz Liszt.

● **LH/MDo.** Il Chor viril Surses va sin turnea cun chanzuns spiritualas a cappella e cun il Requiem da Liszt. Savognin, Cuira e Turitg sa numnan las staziuns. Per il chor da vallada in novum ed a medem temp ina provocaziun.

Per l'emprima giada en l'istorgia dal chor porschan ils 60 umens in'atgna pitschna retscha da concerts ordvart lur stretga patria. Il motiv persuerter è in'ovra pli gronda e pretensiusa, a la quala il chor sa deditgescha mintga 5 enfin 7 onns. La davosa giada a chaschun dal giubileum da 100 onns cun ovras da Gion Giusep e Gion Antoni Derungs, barmier.

Punt rumantscha

Il concert dal chor viril Surses sa cumpona da duas parts. En l'emprima part chanta il chor a cappella, en la segunda part il Requiem da Liszt cun accompagnament da l'orgla concertanta, 2 trumbettas, 2 posauanas e schumbers gronds. L'avertura dal concert fan trais cumposiziuns liturgicas da Anton Bruckner e Josef Rheinberger, cumposiziuns dalla romantica tudestga. I suondan tschintg chanzuns sacralas da la stretga patria surmirana, chantadas per rumantsch. I sa tracta dad ovras tra-

diziunalas, en spezial cun texts dal poet indigen, pader Alexander Lozza. Cun excepziun da Gion Duno Simeon èn ils cumponists (Ernst Broechin, Hans Ludwig Heinrichs) betg indigens. Entras sias relaziuns intensivias cun Surmeir han els però stgaffi cumposiziuns che na savessan strusch esser pli figurativas e marcantas.

Requiem da Liszt cun ina furmaziun exquisita

Las ovras a cappella furman en moda impressiunanta la basa per la segunda part da la saira da concert cun il Requiem da Franz Liszt (1811-1886) en melodia romantica. I sa tracta d'in'ovra fitg emozionala. Liszt vegn cità savens sco il poet dals cumponists. Ses Requiem cumpiglia en ina degna moda e maniera la situaziun dal murir – da la mort. Sut la direziun da Luzius Hassler collaboresch solists da la Opera statala da Hamburg e da la Opera populara da Vienna sco era 5 musicists da la Filarmonia da chombra dal Grischun.

Per il concert a Turitg obtegn ins in bigliet da VIP, che cumpiglia in'introducziun en l'ovra, ina piazza da seser d'emprima classa ed in epiloggastronomic cun l'entir ensemble.

Solists

Peter Gaillard
Samuel Zünd
Alexander Trauner
Wilhelm Schwinghammer

Organist

Stephan Thomas

Musicists

Filarmonia da chombra
Grischun

Direcziun

Luzius Hassler

Prevendita

0900 441 441 u www.chorviril-surses.ch

Ils concerts: Dumengia, igls 17 da mars, a las 15:00 h, Baselia da Nossadunna a Savognin – Venderdi, ils 22 da mars, a las 20:00 h en la Baselia da Son Martin a Cuira – Dumengia, igls 24 da mars, a las 15.00 h en la baselia St. Jakob am Stauffacher, Turitg.

POLITICA

Votaziun agl circuit Belfort

Aint igl circuit Belfort è igl suveran dasperas las votaziuns cantunalas e federalas er gia dad decider sur dad ena revisiun parziala dalla constituziun circuitala. Da nov è igl cunsegl dalla tera survagnia tranter oter la cumpetenza da decider schi las proximas elecziuns digl deputo ed igl sies suppleant igl 2014 succedan all'urna u scu anfignen ossa alla tschantada.

La proposta è neida acceptada ainten igls cumegns digl circuit Alvagni, Brinzauls, Farrera, Lantsch e Surava ed ena participaziun da 49.7% cun 483 EA ancunter 66 vuschs NA.

La revisiun parziala vign siva l'approvaziun antras la regenza digl cantun Grischun ad eir an vigour cun igl 1. fanadour 2013.

COMMUNICAZIUNS

ALVAGNI

Lotto

Igls 08-03-2013, allas 20.30 vign fatg lotta an ustareia digl hotel Belfort.

I dat da gudagner bels prietschs.

Cordiala invitaziun

Societad digl rural
songt Antoni

LANTSCH

Lotto

Venderde igls 15 da mars 2013, allas 20.15 agl restaurant St. Casian a Lantsch.

L'amprema runda è gratuita. Runda speziala. Da gudagner bels prietschs.

Cordialmaintg anveida:

Bual Lantsch Nordic